

IKOT EMI ENỌDE MME ANAM-IDIỌK

Isaiah 55:1-13

ỌYỌHỌ UKPEP-ŃKPO 360

Eke Ikpọ Owo

IKỌ IBUOT: “Owo ekededi eke ọ̀nwọ̀nde mmọ̀n emi Ami ndinọde enye idikopke nsat-itọ̀n aba: edi mmọ̀n oro ndinọde enye eyekabare edi idim mmọ̀n ke esit esie eke otopde akabare ọwọ̀rọ edi nsinsi uwem” (John 4:14).

I. Ikot Eke Enyenede Kpukpru Mbon Nsat-Itọ̀n

1. Owo ekededi emi okopde nsat-itọ̀n ke Spirit eyebo uyuhọ ke mfọn, Isaiah 55:1; Matthew 5:6; John 4:14; Eriyarare 22:17
2. Enọ item esok mmọ eke eyomde ata eti ńkpọ ke mme idiok itie, Isaiah 55:2; Ecclesiastes 11:9; Luke 12:15, 19-21
3. Enọ etop ye uńwọ̀nọ esok mmọ emi enyimedede ikot Abasi, Isaiah 55:3; ńwede Mbon Rome 10:17; 2 ńwede Timothy 3:15; Mme Hebrew 6:17-19; 8:10 ye 9:15 da domo ye Psalm 89:3, 27-35; Utom Mme Apostle 2:29-35 ye 2 ńwede Samuel 23:5
4. Eńwọ̀nọ Christ nte Andinyańa owo, Isaiah 55:4, 5; Luke 19:10; Matthew 18:11-14; 1:21

II. Mme Idaha Emi Eyomde Man Ekpọ̀n Idiok-ńkpọ Eduk Erinyańa

1. Akpa idaha, “Mbufo Eyom Jehovah”, otim owut nsin-ifik emi eyomde eto ata mbon mbuńọ-esit, Isaiah 55:6; Luke 11:10; Deuteronomy 4:29; Jeremiah 29:13
2. Ọyọhọ idaha iba, “Eseme ekot Enye”, owut ntak edibọn akam, Isaiah 55:6; Hosea 14:2; Luke 18:13,14; 2 Chronicles 7:14
3. Ọyọhọ idaha ita, “Yak idiok owo ọkpọn usuń esie”, ọsọńọ owut ete ke enye enyene ndikpọn mme idiok-ńkpọ esie, Isaiah 55:7; Mme ńke 28:13; ńwede Mbon Ephesus 4:21-23; Ezekiel 33:14-16
4. Ọyọhọ idaha inań, “Yak enye onyuń afiak etiene Jehovah”, owut ete ke erikabare-esit edi se eyomde, Isaiah 55:7; Joel 2:13; Psalm 34:18; Luke 15:18, 19
5. Ọyọhọ idaha ition, edi ibọrọ eke Abasi ọnọde ke mfọn: mbọm ye eridahado, Isaiah 55:7; ńwede Mbon Rome 2:4; Titus 2:11, 12; Luke 15:20

III. Abasi Ọńwọ̀nọ Erinyańa Ke Ikọ Esie

1. Mme ekikere ye usuń Abasi ekoń ekan eke owo, Isaiah 55:8, 9; Psalm 8:1-9; 18:30; 40:5
2. Ikọ Abasi, etie nte edim, iditreke ndida ediwak mbuńwum ndi, Isaiah 55:10, 11; 1 ńwede Corinth 3:6, 7
3. Ọyọhọ idaresit edi se enọde mmọ emi ebọde erinyańa, Isaiah 55:12; 12:3; Psalm 51:12; ńwede Mbon Rome 14:17; John 15:11; 17:13
4. Ewut ukpuhọre emi odude ke ufot owo Abasi ye idiok owo, Isaiah 55:13; Psalm 1:1-6

SE EKPEPDE EBAÑA

Isaiah, Anditiń Ntiń-nnim Ikọ Eke Abasi

Isaiah, anditiń ntiń-nnim ikọ eke Abasi ama odu uwem ke eyo Ndidem Judah inań. Ke ini ukara Hezekiah, ke ema ekefiak edemere edu-ukpono Jehovah, utibe edidemere ama ada itie ke ofuri idak ukara, ńko mme owo ke obio ema ewọ̀nọre etiene Abasi. Emi akada itie ke utit ini uwem Isaiah, ndien eyighe iduhe ke edọhọde ete ke emi okoto ke utom ofuri ini uwem owo Abasi emi. Isaiah, ke idak edidemere ye nda-usuń Edisana Spirit, ama ayak ọnọ nnyin ediwak mbufiok ke abańa utibe ye eti uduak Abasi emi abańade eridi Christ, edisuan ye mfiak nnyọń Israel ye eridi ini Ukara Christ ke Tọsin isua.

Edi ata akpan ńkpọ ndikut nte, okposuk edi nte ekese ubak ke otu ntiń-nnim ikọ Isaiah enyenede Nditọ Israel ye edinam Abasi ye mmọ, ediwak eken akabańa Mmọ-oko. Sia Abasi kpukpru owo edide Abasi kpukpru mme idut, ńko sia Ikọ Esie mikpuhọkere ke kpukpru ini; sia Abasi ńko edide ukem-ukem kpukpru ini, ikpuhọkere ke uduot ye mfọn-mma, me ke mbọm Esie ye mfọn-ido; sia Enye ke uduak Esie okosiode Ndimek Ikot Esie onim man ọdiọń onyuń ọnọ item, man oto ke mmọ ofuri ererimbot ekpekut erinyańa, eyighe ikpoduhe ndinyene idorenyin nte ke etop Esie emi ebede ke Anditiń

ntiñ-nnim ikọ eke Enye ekemede ndinọ ubiọñ-utom emi asañade ye nsinsi uduak Esie, ekpenyene ndisim kpukpru owo ke kpukpru ebiet ke ini ekededi.

Ibet nte Moses ọkọnọde ekedi itiat udori ukot emi ańwamde ke ndika iso mmenere erinyaña ke abaña uduak Abasi. Mme anditiñ ntiñ-nnim ikọ ekedi mme ọkwọrọ-ikọ, mmọ emi enamde Ibet Abasi otim ańwaña. Obufa Ediomini owut ete ke mme anditiñ ntiñ-nnim ikọ edi mme ọkwọrọ-Ikọ Abasi. Nditñ ntiñ-nnim ikọ edi ndikwọrọ Ikọ Abasi. Owo ekededi eke adade etop emi miyọhọke minyuñ isañake ukem-ukem ye Ikọ Abasi edi anditiñ ntiñ-nnim ikọ nsu, ndien ana nte kpukpru mmọ emi edide mbon Abasi esin etop esie (Nwedi Mbon Galatia 1:7-9; 2 John 10, 11).

Ikot Abasi Emi Enyenede Ofuri Ererimbot

Mi, ke ibuot nwed emi, nnyin imenyene oyọhọ-oyọhọ Ikọ ke abaña Etop Ikọ Abasi. Mi, nnyin imekeme ndikot nte edọhọde ete ke Ikọ Abasi enyene ofuri owo ekpedi owo inyene me ubuene, ofiok-nwed ye mmọ eke mifiokke, mmọ emi edide ofin me mmọ emi midighe. Etop emi anam ańwaña ete ke isioho owo ndomo kiet ifep, inyuñ ifreke owo baba kiet ke mme eńwọñọ Esie. Mme ikọ emi enyene kpukpru owo ukem-ukem nte “Owo ekededi eke amade” emi odude ke akwa akpatre itie nwed emi abañade utit eyo ke Edisana Nwed Abasi.

Yak mmọ emi ekpepe ete ke erinyaña Abasi enyene ekpri ibat emi ema ekemek ema enam ańwaña se “Owo ekededi eke okopde nsat-itọñ” emi ekotde ete edi edibọ mmọñ uwem ke ikpikpu ọwọrọde. Yak mmọ eke ekwañade Ikọ Abasi ke usuñ ntem enọ idem mmọ uyuhọ edieke mmọ emade, ke ikpikpu ukpep-ńkpọ mmọ emi abañade ikot Abasi nte etrede ke ekpri ibat emi ema ekemek. Mmọ emi eyomde edidiọñ Abasi ekan ńkpọ efen ekededi ekeme ndikut ndọñesit ye uńwọñọ ke emi etiñde ete “Owo eke minyeneke okuk” ekeme ndidi, ndep nnyuñ ndia “idighe ke okuk inyuñ idighe ke ekom-urua”. Mme ikọ emi iyomke aba nte etiñ ńkpọ edian. Mmọ eke eyomde mme owo ekunim mme ikọ emi ke akpanikọ ekeme ndifaña ke ediwewet mme ikpọ nwed ndiwut ekikere mmọ edi Ikot Abasi emi edide mmem-mmem, ńko enyenede ofuri ererimbot ada ke itie esie. Ikot emi edi se etiñde ke mme ibio-ibio, ińwañ-ińwañ ikọ eke minyeneke ntuaha. “Mbon isañ, idem mme anana ibuot, ididuehe” (Isaiah 35:8).

Ofuri Eti-Mbuk Jesus Christ, ke kpukpru uyai uyọhọ esie, edi se inade ińwañ-ińwañ. Enye edi kpa mmem-mmem kpa nte owo mikemeke ndineni, me ndiyik, me ndikpuhọre. Mme idaha etop Ikọ Abasi edi se owo ke uduot owo akanam misimke, mme utuñọ esie edi se owo mikekwe; mme ubom ye uniọñ etop esie ye mme inyene esie edi se owo mikemeke ndidufọre, kpa ye oro etop emi edi ata mmem-mmem koro kpukpru se nnyin inyenede ndifiok ke abaña enye, man ikeme ndinam emem ye Abasi edi mmem-mmem ndifiok.

Mi ke ibuot nwed emi, etiñ ete ke ini odu nnyin ndiyom Abasi, emi ọwọrọde ete ke utọ ini ntre enyene utit. Emi ńko ekekem ye ukpep-ńkpọ Ọbọñ nnyin ye eke mme Mbet. Usen mbom Abasi eyetre, ndien usen ikpe Esie eyetọñọ ukem-ukem nte ńkut-eyo usiere edude ke mme usen uwem emi.

Nsinsi Abasi Ye Ediomini Esie Ye Nnyin

Abasi odu ke nsinsi ke uduot ye ke uyai Esie, ke ntre usuñ Esie ye ekikere Esie ekoñ idaha ekan eke nnyin. Uwem nnyin enyene utit; Enye odu ke nsinsi. Abasi okut esit owo, edi nnyin ise owo ke iso. Abasi okut ekikere esit nte asañade ye edinam me ikọ, edi nnyin ikut edinam, me ikọ eke etiñde ikpọñ-ikpọñ. Abasi ke eritọñọ, ye ke kpukpru ini osuk edi Enye emi ọfonde ama ke edisana-ido, edi ke eritọñọ nnyin isuk idi eke “obukidem, ema enyam nnyin enọ idiok-ńkpọ.” Abasi inyeneke adaña ke baba usuñ kiet, ke esiode mme udomo idaha eke enye ọkọnọde Idemesie ke ndinọ owo unen ndimek se enye amade. Edinam nnyin enyene adaña, sia nnyin “ikutde ńkpọ ntre ntimere-ntimere nte owo okutde ńkpọ ke ukuriso,” inyuñ “ifiok ńkpọ ubak-ubak”. Nnyin imọfiok ite ke erinyaña Abasi ekem kpukpru owo udeme “ndinyaña mmọ emi esañade ke Enye ekpere Abasi oyọhọ-oyọhọ”. Ndien ke otode ke ubọñ ye mfon-mma Abasi ke kpukpru ńkpọ, nnyin imekeme ndikut ite ke erinyaña Esie otim ańwaña onyuñ oyọhọ ke mme inyene Esie akan nte nnyin ikemede nditim mfiok.

Edieke nnyin idikpañde utọñ inyuñ itiene Abasi, ikop nti ikọ Esie, ndien ibọ mme eńwọñọ emi eyọhọde ye mfon Esie, nnyin imekeme ndida mme eńwọñọ Esie emi ebañade nnyin inam ńkpọ: “Nyenam nsinsi ediomini ye afo, kpa ńkpọ ima David.” Emi edi nworọ-nda ye utibe ikọ emi nnyin ke uwem emi midikemeke ndifiok oyọhọ-oyọhọ.

“**Ami nyenam nsinsi ediomini ye afo.**” Abasi emi odude ke nsinsi ikpọñ-ikpọñ ekeme ndinam nsinsi ediomini. Mme ediomini eke mme owo me obio enamde esiwọrọ ikpikpu edieke ukeme ndinam mmọ esu miduhe. Mme uduak owo esisọñọ eda kpa ke ini owo oro odude uwem ndinam mmọ esọñọ

eda; me ke andida-itie owo oro amade onyũ onyimedede ndinam nte ekedimide. Edi mme eñwõño Abasi idibiañake, koro Abasi ikemeke ndibiaña me ndibe mfep. Enye okpono Ikọ Esie akan Enyiñ Esie. Ikọ Esie edi se ema ekebiere ke Heaven ke nsinsi. Ndien ndiwut nte ke ekikere ye uduak Esie ke abaña nnyin emi ikerede enyiñ Esie, inyuñ isinde idem nnyin ke utom Esie idikpuhokere, Enye ikonhọ Ikọ Esie ikpõñ-ikpõñ ke ñkpọ emi, edi okosõño enye ye eñwõño “sia Enye mikekemeke nditomo se ikponde ikan Idem Esie, Enye otomo Idem Esie, ... koro mme owo edade se ikponde ikan idem mmọ eñwõño uñwõño: ke kpukpru eneni eke edude ke ufọt mmọ, uñwõño onyũ edi akpatre ñkpọ eke edade ebiere ikọ. Ntre sia Abasi oyomde mmọ emi edidade uñwõño enyene etim ekut ete Enye idikpuhokere uduak Esie, Enye ada uñwõño edisin: man okpoto ke ñkpọ iba emi mikemeke ndikpuhore, emi Abasi mikemeke ndisu nsu ke esit, nnyin ikpenyene akwa nsõñ-esit, kpa nnyin emi ima ifehe iyom ubọhọ ke erimum idori-enyin emi enimde nnyin ke iso” (Mme Hebrew 6:13-18).

Mme anie edi emi eke Abasi ama akada eñwõño emi odude ke Ikọ Esie anam ediomide ye mmọ emi ke Idemesie mikemeke ndikpuhore, emi Enye ama akada eñwõño emi Enye okpõñwõño ke Idemesie osõño? Anie ke otu nnyin ekeme ndida utọ ekikere oro nnyene, ete ke Okpõsõñ Abasi Andibot kpukpru ñkpọ ekeme ndisõño idaha nnyin ke emi ye ke se ibañade nsinsi ini uwem nnyin, emi nnyin mikemeke ndikpe Enye ekọm urua baba kiet, mme ndikut idem nnyin nte imodot? Anie ekeme ndidhọ ete ke ukeme esie ikpõñ ke imekeme ndida ke iso Abasi mfaña me ndiyom unen eke edide Esie, eke enye amade?

Ukpep-ñkpọ nnyin owut nnyin ete ke mmọ emi enyenede mfõn-iso ekan, kpa mme adia-akpa eñwõño Ediomide, edi mmọ emi esit mmọ ekopde biõñ ye nsat-itõñ, eyomde mmõñ uwem, kpa mmọ eke eyomde uyuhọ enọ biõñ ye nsat-itõñ ke nnen-nnen usuñ. Mmọ “Ekuma ererimbot ye se idude ke ererimbot” (1 John 2:15). Ke ñkañ eken, mme owo emi edi mmọ oro ebemde iso “eyom obio ubõñ Esie ye edinen-ido esie,” Ke ntre mmọ eyekut “kpukpru ñkpọ eken” ediande enọ mmọ (Matthew 6:33).

Nte oruk mbon mfõn-iso emi etim edot ke se enọde mmọ? Ke idem mmọ ikpõñ-ikpõñ, ih, ih! Nte mmọ enam ñkpọ asaña ekekem ke mme ñkpọ emi? Ke ekerede ebaña se mmọ ekemedede ndinam, me se mmọ enyenede, me inyene ubon mmọ, me itie akpan mmọ, mmọ idotke! Nte mmọ enyene ukeme ekem, ke baba usuñ ekedede ndida ke iso Akwa Abasi nte owo akpadade ke iso akwa esop ke ererimbot emi ndifaña ikọ nyom unen mmọ ke iso Abasi? Mmọ ikemeke ndinam emi ke baba usuñ ndomo kiet! Nso ndien idi se edade nte isõñ enam mme ñkpọ emi enọ mbon-ima emi, enyuñ eyakde oruk idaha emi enọ mbon mfõn-iso emi? Mkpasip ñkpọ kiet: mbọm ye ima Abasi, emi okõnõde Ikpõñ Eyen Esie emi Enye obonde man ekpe isop idiok-ñkpọ, mme ndudue nnyin, se nnyin itrede ndinam ye mmem-idem nnyin, onọ nnyin, ñko man esiri akamba ukpe emi odude ke ufọt utibe Andibot kpukpru ñkpọ ye se Enye okobotde.

Unana-utit Mbọm Ye Ima Nsinsi Abasi

Mi ke nnyin ikut unana-utit mbọm ye Ima Abasi nte ayararede. Abasi iyomke baba ñkpọ eke nnyin inyenede, se nnyin idide, me se nnyin ikemedede ndinam. Nnyin, ke ntak idiok mbumek nnyin, ima ikabare iyo iduk ke usuñ idem nnyin, ikabare ikpõñ Enye, isuñi Enye inyuñ isin Enye. Kpa ye oro, Abasi emi oyõhõde ye mbọm ama asiak usuñ erifak, erinyaña ye ubõñ onọ nnyin. Enye omõnõ nnyin ukpõñ emi, ke ido nte Enye anamde ñkpọ Esie mikemeke ndikpa. Sia Abasi mikpuhokere, sia Enye edide edinen ke kpukpru usuñ Esie, ukpõñ oro Enye otõde ke esit owo ikemeke ndikpa, idinyuñ ikpahakpa. Ukpõñ emi akade iso ke ndisin Abasi eyetak ke nsinsi ke unana idorenyin.

Abasi iyomke owo ndomo kiet atak; sia Enye ama okõfiok toto ke eritõño enyene-ndik ekọm-urua eke enyenede ndikpe man afak owo ekpedi kiet, Enye okonyime ndikpe ekọm-urua oro ndifak owo. Iduhe ñkpọ efen, ke mibõhõke anana-utit mbọm ye ima eke minyeneke adaña ekeme ndisiak usuñ ubõhọ eke etiede ntem, man mmọ eke ema ekesin ima ye mbọm oro, edi, ke atuade mkpõfiok ke abaña idiok-ñkpọ ye nsõñ-ibuot mmọ, ekpekeme ndinyene ubõhọ ke idiok itie mmọ, ñko ekpekeme nditie ke mme ndiye ebiet ke heaven, kpa oruk mfõn emi mmọ mikpekemeke ndinyene me ndikpe ekọm-urua.

Nnyin nte owo, imesinam mme ekikere ndinam uduak me ñkpọ inemesit idem nnyin. Mbemiso nnyin inam ekikere nnyin oworọ ada, nnyin isitetie kaña ibat usuñ nte idikpede ekọm-urua. Nte iyekeme ndinam uduak nnyin emi ñkure? Nte nnyin iyekeme ndinam kiet emi ndien itre ndibiõño mme iso utom eñwen emi nnyin ikerede ndinam? Nte utom enye emi eyedori nnyin udori, me eyeda udori edi ke usuñ emi nnyin ikerede ndinam enye? Kpukpru mme mbume emi ye ediwak efen edi se anade ikpe ibiere mbemiso ika iso ke ndinam se anade nnyin ke iso ndinam. Ediwak ini, nnyin isikemeke ndinyaña ndikpõñ iso utom nnim man ikanam efen ke isede ite ke eyeda udori edi, onyũ añwam ke ndinam obufa iso utom.

Edi ke n̄kañ Abasi, utom erifak owo ikedighe se ekenamde ke ntak emi ndudue ama okodu ke akpa ekikere. Abasi ama ofiok toto ke eritoño kpukpru se inyenede ndiworo ke ini iso. Enye ama ofiok mme n̄kpọ eke ediyomde man ada uduak esie edi ke abaña nnyin. Enye ama ofiok ekom-urua eke anade nte Eyen Esie ekpe. Edi Enye ikafañake, okposuk edi ekom-urua ekedide se owo ndomo kiet mikpekemeke ndikpe.

Abasi ama anam ekikere onyũ ekpe ekom-urua. Enye ama onọ ikot. Ndien Enye okodoñ Spirit Esie man ada owo usuñ ndinyime uduak emi ndien obọ erinyaña Esie. Enye ke emi ke ananam uduak Esie oworo ada nte Enye okonimde, man oto do ubon nnyin okpoyoro.

Enye etiñ ye nnyin “Mbufo eyom Jehovah ... eseme ekot enye ... yak idiok owo okpon usuñ esie, yak oburobut owo okpon ekikere esie: onyũ afiak etiene Jehovah: ndien enye eyetua enye mbom: etiene Abasi nnyin, koro Enye eyewak ndidahado.”

MME MBUME

1. Enọ ikot emi ikutde ke akpa ufañ ke ukpep-n̄kpọ emi esok mme anie?
2. Kpep 1 John 2:15-17 sin ke ibuot.
3. Didie ke nnyin ifiok ite ke uduak Abasi ke abaña erinyaña enyene nnyin?
4. Nso ke Abasi akanam, adian ke Ikọ Abasi eke Enye onode nnyin emi onyũ onode nnyin idorenyin ye eti ifet ke abaña erinyaña Esie?
5. Nso idi ntak emi mme owo edade uñworo? Nso idi ntak emi Abasi akanamde ntre ke abaña erinyaña nnyin?
6. Siak mme idaha kiet-kiet emi odude ke erinyaña.
7. Ikọ Abasi odoro ntem “ke mfon ke ema enyaña mbufo oto ke mbuotidem.” Nso idi mfon? Nso idi mbuotidem? Nnyin isaña didie inyene mbuotidem?
8. Mme ekikere ye mme usuñ Abasi ekoñ ekan eke owo. Tiñ mme n̄kpọ emi esoro eke ikọ emi. Didie ke mme ekikere ntem atuaha ye uduak Abasi ke abaña usuñ erinyaña?
9. Siak mme edidoro eke ibode ito ke erinyaña Abasi.
10. Ke adade Psalm 1 nte ibuot ikọ, tiñ ukpuro eke odude ke ufot eti owo ye idiok owo.